



REGULAMENTO DOS SERVIZOS PÚBLICOS DE SANEAMENTO E DEPURACIÓN DE AUGAS RESIDUAIS E USO DOS MESMOS DO CONCELLO DE BARBADÁS

PREÁMBULO

A Directiva 91/271/CEE, de 21 de maio, relativa ao tratamento das augas residuais urbanas, sinala a necesidade de que os vertidos de augas residuais industriais que sexan incorporadas ao sistema de saneamento e depuración de augas residuais urbanas, sufran un tratamento previo para garantir, principalmente, que non teñan efectos nocivos sobre as persoas e o medio ambiente, e que non deterioren as infraestruturas de saneamento e depuración.

A lei 9/2010, de 4 de novembro, de augas de Galicia, declara no seu artigo 32, de interese da Comunidade Autónoma de Galicia o servizo de depuración de augas residuais urbanas cuxo ámbito material comprende a regulación, planificación, aprobación definitiva de proxectos, a construción e a xestión, explotación e mantemento de estacións depuradoras de augas residuais, redes de colectores xerais e conducións de vertido que formen parte do Plan galego de saneamento. O artigo 27 da mesma lei reserva á competencia municipal a prestación do servizo de sumidoiros e o control dos vertidos a estas redes.

O Decreto 141/2012, do 21 de xuño, polo que se aproba o Regulamento marco do servizo Público de Saneamento e Depuración de Augas Residuais de Galicia na súa disposición transitoria primeira establece que as entidades locais adecuarán as súas ordenanzas e regulamentos sobre planificación, deseño, uso e vertidos ás redes de saneamento públicas ao disposto neste regulamento marco no prazo de dous anos a contar dende a súa entrada en vigor segundo o disposto no artigo 32.3 da Lei 9/2010 de augas de Galicia.

CAPÍTULO I

Disposicións xerais

Artigo 1º . Obxecto e finalidades

O presente regulamento ten por obxecto regular os vertidos de augas residuais á rede de sumidoiros pública e establecer as características e condicións técnicas das conexións á rede e as condicións ás que deberá axustarse o uso desta rede de sumidoiros e das súas instalacións complementarias deste Concello.

Dacordo con este obxectivo xeral, as finalidades son:

a) Regular as condicións ás que deberá axustarse o uso da rede municipal de sumidoiros e das súas



obras e instalación complementarias.

- b) Garantir a evacuación e o tratamento das augas residuais de xeito eficaz co fin de preservar o estado das masas de auga e posibilitar os seus máis variados usos, incluíndo a súa reutilización.
- c) Adecuar a calidade da auga dos efluentes das estacións depuradoras para dar cumprimento á normativa básica sobre depuración de augas residuais urbanas, sen prexuízo do respecto aos obxectivos ambientais establecidos na lexislación e na planificación hidrolóxica aplicables.
- d) Prohibir a vertedura ás redes de sumidoiros e colectores, de augas residuais de orixe industrial, agrícola e gandeira, cuxas características incumpran o esixido neste regulamento, ou poidan alterar o correcto funcionamento das instalacións afectas ao servizo.
- e) Garantir que o conxunto das verteduras da rede de saneamento municipal se adecúa ás características de deseño da correspondente instalación de depuración.
- f) Xestión eficiente das instalacións a partir dun deseño coherente coas Instrucións técnicas para obras hidráulicas en Galicia aprobadas por Augas de Galicia.
- g) Adecuar os permisos de vertedura ás esixencias e requirimentos do progreso técnico, adecuación que non será indemnizable e cuxo incumprimento poderá dar lugar á suspensión e á revogación do permiso, que non terán carácter sancionador.

Artigo 2º . Ámbito de aplicación

Será de aplicación a tódolos usuarios que realicen vertidos, directos ou indirectos tanto de natureza doméstica como industrial, de augas residuais e pluviais, aos sistemas de saneamento e depuración de augas residuais que vertan ou se integren na rede pública do Concello.

Artigo 3º . Definicións

A efectos deste regulamento establécense as definicións seguintes:

- a) **Sistema público de saneamento e depuración de augas residuais:** conxunto de bens de dominio público interrelacionados, composto por unha ou máis redes locais de sumidoiros, colectores, estacións de bombeo, conducións de vertedura, estación depuradora de augas residuais e outras instalacións de saneamento asociadas, co obxecto de recoller, conducir ata a estación e sanear, de maneira integrada, as augas residuais xeradas nun ou máis municipios ou en parte dun ou máis municipios. As acometidas ao sistema non forman parte do sistema público.
- b) **Augas residuais urbanas:** as augas residuais domésticas ou a mestura delas coas augas residuais non domésticas, así como con augas de escurregamento pluvial.
- c) **Augas residuais domésticas:** as augas residuais procedentes dos usos residenciais das vivendas,



actividades comerciais sen almacenaxe, oficinas e talleres integrados nas vivendas, xeradas principalmente polo metabolismo humano e as actividades domésticas.

d) **Augas residuais non domésticas (ou industriais):** as augas residuais vertidas desde establecementos nos que se efectúe calquera actividade industrial, agrícola ou gandeira, que non sexan augas residuais domésticas ou de escorregamento pluvial. Entenderase por actividade industrial aquela que consista na produción, transformación, manipulación, reparación e almacenaxe de materias primas e produtos manufacturados.

e) **Augas brancas:** as augas que non foron sometidas a ningún proceso de transformación de xeito que a súa potencial capacidade de perturbación do medio é nula e, polo tanto, non deben ser conducidas mediante os sistemas públicos de saneamento. A súa procedencia é diversa: augas destinadas á rega agrícola, augas subterráneas, augas superficiais, fontes ou mananciais, e augas procedentes da rede de abastecemento.

f) **Augas pluviais:** as producidas simultaneamente ou inmediatamente a continuación de calquera forma de precipitación natural e como resultado da mesma. As augas de escorregamento pluvial terán carácter de augas brancas ou de augas residuais urbanas en función da posibilidade de alteración dos obxectivos de calidade do medio receptor. Así mesmo, terán esta consideración as augas de refrixeración en función das súas características.

g) **Residuos sólidos ou semisólidos xerados:** os lodos orixinados nos sistemas públicos de saneamento e depuración de augas residuais urbanas, así como o resto de residuos xerados nos sistemas públicos de saneamento e depuración.

h) **Entidade xestora :** a Administración pública que ten encomendada a xestión de cada un dos sistemas públicos de saneamento e depuración de augas residuais, de acordo co disposto nos artigos 26 e 27 da Lei 9/2010, de Augas de Galicia con independencia de que o servizo se preste directa ou indirectamente.

i) **Estación depuradora de augas residuais:** conxunto de instalacións necesarias para, como mínimo, o tratamento físico, fisicoquímico ou biolóxico das augas residuais domésticas

j) **Sumidoiro público:** todo conxunto subterráneo de saneamento construído ou aceptado polo Concello para servizo xeral do seu territorio ou parte do mesmo, dos que a súa limpeza e conservación pertencelle ó Concello ou, por adxudicación dos mesmos, á empresa adxudicataria.

k) **Acometida:** conxunto de elementos interconectados que unen a rede pública de saneamento coa instalación privada dunha vivenda ou edificio.



l) **Embornal:** toda instalación composta de boca e dispositivo de caída e condución ata a rede de sumidoiros, destinado a recoller e conducir á rede de sumidoiros públicos as augas superficiais de escorrentías dunha vía pública.

m) **Redes unitarias:** aquelas que constan dunha soa canalización pola que en tempo seco circulan augas residuais urbanas e en tempo de chuvía asume tamén a función de drenar as augas pluviais, provocándose unha mestura de ambos os tipos de augas.

n) **Redes separativas:** aquelas que constan de dúas canalizacións independentes; unha delas transporta as augas residuais de orixe doméstica, comercial ou industrial ata a estación depuradora, e a outra conduce as augas pluviais ata o medio receptor, ou ata un posible sistema de tratamento previo á súa vertedura

ñ) **Informe de vertido:** o informe obrigatorio que deberá emitilo Servizo, en tódalas solicitudes de conexión á rede de sumidoiros.

o) **Permiso de vertido:** a licenza expedida polo Concello despois da tramitación do correspondente expediente administrativo autorizando o vertido ao sumidoiro público.

Artigo 4º . Titularidade dos servizos e forma de xestión

A Entidade Xestora dos servizos de saneamento e depuración é o CONCELLO DE BARBADÁS

O Concello de BARBADÁS xestiona estes servizos de forma indirecta e ten encomendada á Empresa VIAQUA S.A.U., en adiante SERVIZO, a administración e explotación dos servizos aos que se refire este Regulamento.

Artigo 5º. Das redes de saneamento e os seus elementos

1. O Concello desenvolverá accións para a paulatina substitución de redes unitarias por redes separativas sempre que sexa posible, garantindo a calidade da auga pluvial na vertedura ao medio receptor ou na súa reutilización, ben mediante a aplicación de técnicas de drenaxe urbana sustentable en orixe ou ben estruturais.

2. Nos casos en que resulte imposible a separación das redes aplicaranse as técnicas de drenaxe urbana sustentable en orixe para minimizar a entrada da auga pluvial nos sistemas de saneamento, así como as técnicas de drenaxe urbana sustentable estruturais para garantir a xestión eficaz do volume de auga resultante tanto na rede como na estación depuradora de augas residuais, así como para garantir a calidade do efluente vertido ao medio receptor.

3. Tanto no caso de redes separativas como unitarias garantirase a compatibilidade das verteduras ao



medio receptor coa lexislación vixente, de xeito que se asegure a capacidade do medio para recibir estes efluentes, tanto desde o punto de vista cualitativo coma cuantitativo. As verteduras ao medio realizaranse a través da estación depuradora, desaugadoiros ou outros elementos que formen parte da rede, os cales estarán perfectamente identificados.

CAPÍTULO II

Utilización dos sistemas públicos de saneamento e depuración de augas residuais. Obrigas e dereitos da Entidade Xestora, do Servizo e dos usuarios. Instrucións sobre o uso e construción de acometidas e ampliacións da rede de sumidoiros.

Artigo 6º. Condicións previas para a conexión

1. Para a conexión dun novo usuario ao sistema público de saneamento é necesario que a rede local de sumidoiros se atope en servizo e que a vertedura do usuario cumpra as condicións establecidas neste regulamento.

2. De conformidade co Real decreto 509/1996, do 15 de marzo, de desenvolvemento do Real Decreto Lei 11/1995, do 28 de decembro, polo que se establecen as normas aplicables ao tratamento das augas residuais urbanas, as verteduras de augas residuais non domésticas nos sistemas de saneamento ou nos sistemas de depuración serán obxecto do tratamento previo que sexa necesario para:

- a) Garantir que as verteduras das instalacións de tratamento non teñan efectos nocivos sobre o ambiente e non impidan que as augas receptoras cumpran os obxectivos de calidade da normativa vixente.
- b) Protexer a saúde do persoal que traballe nos sistemas de saneamento e depuración.
- c) Garantir que as instalacións dos sistemas de saneamento e depuración e os equipamentos correspondentes non se deteriorenen.
- d) Garantir que non se obstaculice o funcionamento das instalacións de tratamento de augas residuais.
- e) Garantir que os lodos poidan evacuarse con completa seguridade de xeito aceptable desde a perspectiva ambiental. En ningún caso se autorizará a súa evacuación aos sumidoiros ou ao colector.

Artigo 7º. Uso obrigado da rede de sumidoiros

- 1- Declárase de recepción obrigatoria o servizo de saneamento e depuración para todos aqueles titulares de edificacións e vivendas onde estea establecido o servizo por parte do Concello por razón de hixiene, sanitarias e medioambientais.
- 2- Están obrigados ao uso da rede de sumidoiros todas as instalacións situadas a menos de 100 m de dita rede



- 3- O Concello concederá a licenza de conexión á rede de saneamento solicitada polos interesados nas condicións que este regulamento establece. Nos casos nos que non conste solicitude por parte do propietario, e sexa de aplicación o disposto no punto 2 deste artigo, requirirase ao mesmo para que achegue a documentación pertinente no prazo de 10 días. No caso de desatender o devandito requirimento, actuarase de oficio e se dará de alta o contrato segundo os datos que obren ou consten no Concello.
- 4- A efectos do disposto no presente regulamento, establécese como requisito esencial para todo inmovible, a conexión á rede xeral de saneamento. En consecuencia, non se concederán licenzas cando nos correspondentes proxectos de obra que se presenten ante a Administración Municipal non conste a conexión coa rede xeral de saneamento.
- 5 - Os edificios que dispoñan de fachada a un vial no que exista rede de sumidoiros deberán verter as súas augas residuais a través da correspondente acometida. No caso de que a edificación teña fachada a máis dunha vía pública, o propietario poderá escoller o sumidoiro publico ao que vai verter salvo que existan condicións técnicas que o impidan.
- 6 – Cando en solo urbano, non exista sumidoiro público fronte ao solar, o propietario deberá conducir as augas residuais ata o sumidoiro máis próximo mediante a construción dunha prolongación da rede que poderá facerse mancomunadamente por tódolos propietarios de fincas situadas no mesmo tramo. Dita prolongación deberá axustarse ás aliñacións e rasantes dos viais previstos no planeamento vixente.
- 7- Os edificios existentes á entrada en vigor deste regulamento deberán axustarse ás seguintes condicións:
- se dispoñen de pozo negro ou fosa séptica, e tecnicamente é posible a súa conexión á rede de sumidoiros, os propietarios estarán obrigados a conectarse a través da correspondente acometida e a anular o pozo negro ou fosa séptica
 - no caso de non existir rede de sumidoiros, as instalacións deberán de dispor dun sistema propio de tratamento de augas residuais e obter a correspondente autorización de vertido outorgada polo organismo de bacía competente sen prexuízo da obriga de conectar no sumidoiro público cando este se constrúa.
- 8- Os establecementos non domésticos deberán unificar as verteduras xeradas nos distintos procesos produtivos minimizando na medida do posible, sempre que sexa tecnicamente e economicamente viable, o número de puntos de conexión aos colectores. No caso das augas pluviais, deberán aplicarse



as oportunas técnicas de drenaxe urbana sustentable, de acordo coas Instrucións técnicas para obras hidráulicas en Galicia, aprobadas por Augas de Galicia.

Artigo 8º. Obrigas da Entidade Xestora

O Concello, estará suxeito ao cumprimento das seguintes obrigas:

- 1- Prestar o servizo a todo aquel usuario que o solicite nos termos establecidos no presente regulamento.
- 2- Manter as instalacións e as condicións sanitarias de acordo coa normativa vixente aplicable.
- 3- Manter permanentemente a dispoñibilidade e regularidade do servizo mediante a vixilancia, conservación e reparación de todas as instalacións incluídas nel.
- 4- Facturarlles aos usuarios de acordo coa tarifa vixente aprobada polo organismo competente.
- 5- Realizar campañas de información e sensibilización da poboación en xera e dos usuarios con verteduras non domésticas en particular, co fin de reducir as verteduras á rede de saneamento de substancias e produtos tóxicos do fogar, talleres, etc.
- 6- Facilitar aos técnicos redactores de proxectos as características técnicas da rede.
- 7- Dispor dun servizo permanente de atención aos subscritores.

Artigo 9º. Dereitos da Entidade xestora

O Concello terá dereito a :

- 1- Percibir as cantidades que correspondan segundo a aplicación das tarifas aprobadas.
- 2- Dispoñer dunha retribución económica suficiente para o mantemento do equilibrio económico.
- 3- Inspeccionar e revisar as instalacións interiores dos usuarios .

Artigo 10º. Obrigas do Usuario

O subscritor estará suxeito ás seguintes obrigas:

- 1- Satisfacer puntualmente o importe dos servizos de acordo coas tarifas vixentes aprobadas.
- 2- Verter da forma establecida e conforme aos usos contratados.
- 3- Aboar as cantidades resultantes das liquidacións que, por erro, fraude ou avaría se lle poidan imputar.
- 4- Permitir a entrada no local ao persoal do servizo, que irá debidamente identificado, para instalar os elementos que sexan necesarios ou inspeccionar as instalación.
- 5- Cumprir as condicións e obrigas técnicas e administrativas contidas no contrato ou póliza ou no permiso de vertedura.
- 6- Comunicar ao Concello ou ao Servizo calquera modificación da instalación interior que



supoña unha modificación dos puntos de vertedura.

Artigo 11º. Dereitos do Usuario

O usuario dos servizos gozarán dos seguintes dereitos:

- 1- Dispoñer das condicións técnicas axeitadas para a normal evacuación das augas residuais de acordo coas instalación existentes.
- 2- Recibir a facturación dos servizos de saneamento e depuración de acordo coas tarifas vixentes en cada momento.
- 3- Solicitar ao Concello ou ao Servizo as aclaracións, informacións ou o asesoramento que precise así como recibir contestación por escrito das consultas formuladas por este procedemento.
- 4- Formular as reclamacións administrativas que considere convenientes acreditando a súa condición de titular do contrato ou do representante legal.
- 5- Ser informado de todas as cuestións derivadas da prestación e funcionamento do Servizo que precise.

Artigo 12º. Acometidas

1-Sen prexuízo do establecido no presente Regulamento, a construción de calquera elemento da rede de sumidoiros, acometidas, embornais, etc., axustarase ó disposto no **Anexo I** (normas de execución de acometidas e ampliacións das redes de sumidoiros e de pluviais) e pola normativa urbanística do Concello así como pola regulamentación técnica en vigor.

2-As augas residuais dun edificio conduciranse á rede de sumidoiros a través da acometida que constará basicamente dunha arqueta de rexistro pegada á liña da fachada e construída sempre na vía pública e dun conduto transversal á rúa que conectará dita arqueta coa rede de sumidoiros. As acometidas deberán conducir por separado as augas pluviais e residuais.

3-Deberá instalarse un sifón xeral ou un sistema xeral en cada edificio para evitar o paso de gases. Entre a acometida da condución e o sifón xeral do edificio se disporá dun tubo de ventilación, sen sifón nin peche.

4-As acometidas serán construídas a cargo do interesado, logo da obtención da correspondente licenza e da inspección por parte do propio Servizo ou dos Servizos Técnicos Municipais segundo as normas de execución de acometidas do **Anexo I**. En todos os casos, a conexión coa rede pública a fará o servizo. Todos os gastos derivados das actuacións de conexión ao sistema, así como os da súa conservación e mantemento, serán por conta da persoa usuaria, que é a responsable do seu mantemento.



A limpeza e reparación dos desaugadoiros particulares será realizada polos seus propietarios logo da obtención da oportuna licenza municipal. Non obstante, poderán solicitar que ditos traballos sexan realizados polo Concello ou a través do Servizo con cargo ao solicitante.

6- O solicitante da licenza de acometida presentará un plano da rede de desaugadoiro interior do inmovible en planta e alzado a escalas 1:100 ou 1:50 detallando expresamente os sifóns xerais e a ventilación aérea.

7- Na construción de acometidas ademais de cumprirse as disposicións e dimensións adecuadas para un desague correcto, deberán cumprirse as seguintes condicións:

☞ A instalación interior deberá asegurar a ventilación aérea e o illamento sifónico das baixantes de forma que se impida a decantación de sólidos e acumulación de flotantes tal e como reflexa o esquema do **Anexo II**.

☞ Nas instalacións hoteleiras e asimiladas, hospitais, obradoiros, estacións de servizo, talleres automobilísticos, garaxes e aquelas establecidas na normativa específica, construírase una arqueta decantadora de graxas e sólidos antes da acometida e no interior da propiedade.

☞ Nas instalacións industriais, a rede de desaugadoiro interior completárase cun pretratamento que asegure que o efluente reúne as condicións que se esixen neste regulamento.

9- As acometidas construídas por empresas distintas ao Servizo, antes da súa entrada en funcionamento, terán que ser inspeccionadas polo propio Servizo. O custo desta inspección virá determinado pola Ordenanza Fiscal ou cadro de prezos correspondente.

10- Cando o nivel do desague particular non permita a súa conexión á rede de sumidoiros por gravidade, a elevación deberá ser realizada polo propietario da finca. No caso de que a impulsión discorra por terreo público, o Servizo só autorizará a acometida da primeira vivenda e a partir da segunda solicitude, o Concello construírá un bombeo para elevar todas as augas residuais desa zona.

Artigo 13º. Prolongación das redes de sumidoiros. Redes de sumidoiros de nova construción

☞ Para os efectos deste regulamento, considerarase que é necesario realizar unha ampliación ou mellora da rede de sumidoiros existente, nos seguintes casos:


-cando, aínda que exista rede de sumidoiros nalgún terreo público lindante co inmovible, a acometida supoña un aumento de caudal que a rede existente non poida asumir.


-cando non exista rede no vial público ao longo do fronte da parcela do inmovible







-cando a rede existente sexa rede primaria ou impulsión.

 Cando sexa necesario efectuar unha ampliación da rede xeral para executar unha acometida, correrán por conta do solicitante a totalidade dos gastos que se orixinen. Ao remate das obras, estas pasarán a ser de propiedade municipal e se poderán conectar a esta rede as acometidas xa existentes.

 As ampliacións da rede deberán discorrer, con carácter xeral, por terreos de dominio público. Si existen tramos situados en terreo privado, os propietarios afectados polo paso da tubaría, poñerán a disposición do Concello unha franxa de tres metros de ancho ao longo do seu percorrido e non poderán obstaculizar o acceso do persoal ou da maquinaria para a súa reparación ou inspección. Nos casos en que o solicitante da ampliación de rede non sexa o propietario dos terreos polos que vai discorrer a tubaría, deberá acordar co propietario a adquisición do terreo necesario, ou ben, constituír unha servidume de acueduto inscribíndoa no Rexistro da Propiedade.

 Unha vez construída unha nova rede de sumidoiros pública, se procederá á anulación de todos os desaugadoiros particulares que fosen autorizados con carácter provisional sendo obrigatoria a conexión directa aos novos sumidoiros.

 En ningún caso se lle poderán esixir ao Concello responsabilidades polo feito de que a través do desague poidan entrar nunha finca particular augas procedentes do sumidoiro público.

CAPÍTULO III

Permiso de vertedura

Artigo 14º. Condicións para a utilización do sistema público de saneamento e depuración

1. Quedan obrigadas a obter permiso de vertedura ao sistema público de saneamento e depuración de augas residuais e a respectar en todo momento as prohibicións e limitacións establecidas respectivamente nos **anexos III e IV** deste regulamento, as seguintes persoas usuarias:

a) Os/as usuarios/as non domésticos/as cuxa actividade estea comprendida nas correspondentes epígrafes da vixente CNAE-2009, aprobada polo Real Decreto 475/2007, equivalentes ás epígrafes C, D, E e F do CNAE-93, segundo os cadros de equivalencias entre a CNAE-93 e a CNAE-2009 elaborados polo Instituto Nacional de Estatística, así como aqueloutros/as usuarios/as non domésticos/as cuxa vertedura sexa superior a 2.000 metros cúbicos anuais.

b) Os usuarios cun volume de vertedura inferior a 2.000 metros cúbicos anuais pero que orixinen





contaminación especial nos termos do artigo 47.1.c) da Lei 9/2010, de augas de Galicia.

2. O resto de persoas usuarias cuxa actividade xenere augas residuais domésticas deberán cumprir as disposicións e normativa do presente regulamento

3. En canto ao sistema de depuración cumpriranse as condicións impostas nas autorizacións de vertedura á canle pública ou ao dominio público marítimo-terrestre que dite Augas de Galicia.

Artigo 15º. Prohibicións e limitacións

1. Están prohibidas:

a) A vertedura ao sistema de saneamento e depuración das substancias relacionadas no **Anexo III** deste regulamento.

b) A dilución para acadar os niveis de emisión que permitan a súa vertedura ao sistema, excepto nos supostos de emerxencia ou de perigo inminente. Nestes supostos deberase realizar a comunicación inmediata destas circunstancias á entidade xestora, a cal deberá adoptar as medidas que en cada caso fosen pertinentes.

c) A vertedura de augas pluviais ao sistema cando se poida adoptar unha solución técnica alternativa.

d) A vertedura de augas brancas ao sistema.

2. As verteduras que conteñan substancias das relacionadas no **Anexo IV** (verteduras limitadas) deste regulamento deberán respectar en todo momento as limitacións que se especifiquen no contido do permiso de vertedura ou outras para substancias non especificadas no dito anexo que o Concello de BARBADÁS considere, co fin de protexer os sistemas de saneamento e depuración ou o medio ao que verte. Naqueles parámetros do **Anexo IV** para os cales non se especifiquen limitacións no contido do permiso de vertedura, as limitacións serán as especificadas no dito anexo. Non se admitirá a dilución para acadar ditos límites e o incumprimento desta prohibición será tipificado polas ordenanzas e os regulamentos locais e será sancionado de conformidade co réxime establecido no artigo 85.b) da Lei 9/2010, de augas de Galicia.

3. O permiso de vertedura poderá establecer valores máis restritivos que os previstos no **Anexo IV** deste regulamento e, así mesmo, poderá establecer limitacións de caudal respecto de parámetros específicos, todo iso en función da capacidade do sistema.

4. Logo de consulta do Concello, Augas de Galicia poderá adoptar limitacións diferentes das establecidas no punto anterior cando, en aplicación das mellores técnicas dispoñibles, se consiga para unha mesma carga contaminante vertida ao sistema unha diminución do caudal de vertedura indicado



no permiso correspondente mediante o emprego de sistemas de aforro de auga por parte da persoa titular do permiso.

Artigo 16º. Solicitud de permiso de vertedura

Antes de efectuar ningunha vertedura de augas residuais ao sistema, as persoas usuarias de novas acometidas titulares das actividades indicadas no artigo 9.1 deben solicitar ao Concello o correspondente permiso de vertedura, e achegar, como mínimo, a documentación que se indica no **Anexo V** deste regulamento.

Así mesmo, a solicitud de permiso de vertedura incluírá unha declaración responsable firmada polo titular ou representante da persoa física ou xurídica que o solicita, por medio da cal declara o cumprimento deste Regulamento en canto a que non se verte ningunha sustancia das catalogadas como prohibidas no **Anexo III** nin se excedan as concentracións máximas permitidas para as sustancias que se especifican no **Anexo IV**. A solicitud de vertedura e a declaración responsable axustaranse o modelo que figura no **Anexo VI**.

O Servizo estudará a documentación achegada para a concesión do Permiso de Vertedura, realizará unha visita as instalacións e as análises que estime oportunas da composición do vertido con cargo ó petionario para comprobar que cumpre as condición impostas neste Regulamento, e informará ao respecto ao Concello para a súa aprobación ou denegación.

Os prezos das inspeccións e das análises serán aprobados nunha Ordenanza Fiscal. Así mesmo o Concello resérvase o dereito de aplicar un factor de contaminación “k” en función do tipo de industria ás empresas suxeitas á obtención do permiso de vertedura que afectará á taxa de saneamento ou depuración . No caso de que sexa aprobado, este factor cubrirá os custes das devanditas inspeccións e análises.

Artigo 17º. Permiso de vertedura

- 1- O permiso de vertedura ao sistema público de saneamento e depuración será outorgado aos usuarios indicados no artigo 14.1 polo Concello previo informe do Servizo
- 2- O outorgamento do dito permiso faculta as mencionadas persoas usuarias para realizaren verteduras de augas residuais ao sistema público de saneamento nas condicións establecidas nel.
- 3- O prazo máximo para ditar resolución por parte do Concello será de seis meses desde que se reciba a solicitud de permiso . Transcorrido o dito prazo sen que se dite resolución, a solicitud entenderase





denegada.

Artigo 18º. Réxime de obtención do permiso de vertedura

1. O procedemento para a obtención do permiso de vertedura aos sistemas públicos de saneamento e depuración no caso de actividades comprendidas no ámbito de aplicación da Lei 16/2002, do 1 de xullo, de prevención e control integrados da contaminación, así como na normativa que sobre a materia aprobe a Comunidade Autónoma de Galicia, será o establecido nas mencionadas normas.

2. No caso de que as actividades non se atopen afectadas polo punto primeiro, serán de aplicación as normas do procedemento administrativo común.

Artigo 19º. Contido do permiso de vertedura

1. A resolución de concesión do permiso de vertedura ao sistema público de saneamento que dite o Concello segundo o informe emitido polo Servizo deberá incluír, como mínimo, os seguintes aspectos:

a) Os límites máximos admisibles das características cualitativas da vertedura, tanto en concentracións máximas instantáneas como en concentracións medias máximas.

b) Os límites cuantitativos do volume da vertedura, indicando o caudal medio diario, o volume máximo diario e o máximo caudal instantáneo e a súa duración.

Nos casos en que o vertido por si só, ou conxuntamente con outros vertidos autorizados con anterioridade, supere no seu caudal/horario punta, durante 15 minutos, o 5% do caudal medio horario da Estación Depuradora de Augas Residuais, realizárase un estudo específico con valores límite dos elementos detallados que poderán ser máis estritos que os especificados con anterioridade.

c) A obriga de instalar, no prazo máximo de seis meses desde a notificación da resolución, **unha arqueta** coas características que se definan no permiso, facilmente accesible e identificable, que permita as tarefas de inspección e control recollidas na resolución de permiso de vertedura.

d) Con carácter xeral, agás por razóns xustificadas debidamente motivadas, os permisos de vertedura outorgáranse por un período máximo de cinco anos, renovables por idénticos períodos, por consentimento expreso e por escrito do Concello. Nos supostos do artigo 18.1, a vixencia do permiso someterase ao prazo da autorización ambiental integrada.

e) O **número de inspeccións anuais** que vai realizar o Servizo con cargo ao responsable do vertido que incluírán como mínimo unha análise do vertido para comprobar que se cumpren as condicións iniciais.

Como mínimo realizárase unha análise do vertido ao ano durante a vixencia do permiso para



comprobar que se manteñen as condicións baixo as que se outorgou dito permiso de vertedura. As analíticas da vertedura a realizar nun ano se determinarán en función do caudal anual total de vertedura segundo a seguinte táboa:

CAUDAL (m ³ /ANO)	PERIODICIDADE DE CONTROL
< 5.000	ANUAL
5.000-20.000	SEMESTRAL
20.000-50.000	TRIMESTRAL
50.000-100.000	MENSUAL
> 100.000	QUINCENAL

2. O permiso de vertedura ao sistema de saneamento poderá, ademais, establecer limitacións, condicións e garantías en relación con:

a) **Aforo de caudais:** obriga de instalar na dita arqueta dun **elemento de medida** cun rexistro totalizador e instantáneo para a determinación exacta do caudal do efluente vertido. Cando os volumes de auga consumida e os volumes de auga vertida sexan aproximadamente os mesmos, a medición da lectura do caudal de auga de abastecemento poderá utilizarse como medida do caudal vertido sempre que o sistema de medida de auga consumida permita obter caudais instantáneos.

b) Horario de vertedura.

c) **Pretratamento:** definición das instalacións de tratamento previo da vertedura que resulten necesarias para acadar as condicións cualitativas ou cuantitativas impostas e o prazo de execución delas.

d) A obriga de instalar os medios necesarios para a **toma de mostras** ou a instalación dun **tomamostras automático** para o caso de industrias que, a criterio do Servizo ou do Concello sexan significativas polo seu volume de vertido e/ou pola súa carga contaminante. Dito tomamostras automático deberá ser programable no tempo, ter una bomba de aspiración e permitir a refrixeración das mostras. Deberá ser instalado nunha caseta destinada a tal fin, provista de pechadura e so accesible ao persoal inspector do Servizo ou do Concello.

e) A obriga de instalar medición en continuo de distintos parámetros para o caso de industrias que, a criterio do Servizo ou do Concello sexan significativas polo seu volume de vertido e/ou pola súa carga contaminante.

f) Poderanse establecer excepcións temporais dos requirimentos do **Anexo IV**, sempre que se



aprobe un programa que garanta o seu cumprimento nun prazo determinado desde a notificación da resolución. Tamén se poderán establecer excepcións motivadas pola baixa saturación do sistema, tendentes a aproveitar ao máximo as súas capacidades de depuración e, de ser o caso, delimitadas no tempo ou na carga.

g) Realización de autocontrois por parte do titular do permiso, nos supostos de verteduras que comporten un risco elevado de impacto sobre o sistema de saneamento e depuración.

h) A realización de programas de seguimento da vertedura.

h) A obriga de remitir informes periódicos ao Concello.

i) Establecer condicións complementarias para asegurar o cumprimento deste Regulamento.

3. En ningún caso a concesión do permiso de vertedura comprometerá a consecución dos obxectivos de calidade do medio receptor do efluente depurado do sistema público de saneamento e depuración.

4. A inspección, vixilancia e control do cumprimento das condicións do permiso de vertedura corresponde ao Concello e pode exercela a través do Servizo, sen prexuízo da intervención de Augas de Galicia na súa función de alta inspección.

Artigo 20º. Revisión do permiso de vertedura

1. Sen prexuízo do disposto na Lei 16/2002, do 1 de xullo, de prevención e control integrados da contaminación, o permiso de vertedura ao sistema de saneamento deberá revisarse, logo de audiencia do interesado, cando se produza algún cambio significativo na composición ou no volume da vertedura, cando se alteren substancialmente as circunstancias que motivaron o seu outorgamento, ou cando sobreveñan outras circunstancias que, de existiren anteriormente, terían xustificando a súa denegación ou o seu outorgamento en termos diferentes.

2. En todo caso, procederase á revisión do permiso:

a) Cando a carga contaminante vertida por unha actividade resulte significativa en relación co total tratado polo sistema e poida dificultar a súa depuración nas condicións adecuadas.

b) Cando o efecto aditivo de verteduras das mesmas características poida dificultar o tratamento do sistema nas ditas condicións adecuadas.

3. No caso de que a revisión comporte a modificación das condicións da vertedura ao sistema, o Concello poderá conceder á persoa titular do permiso un prazo de adaptación que non excederá dun ano contado desde a aprobación da revisión.

4. Se a persoa titular do permiso non realizase as modificacións no prazo que, para o efecto, lle indique o Concello, este poderá declarar a caducidade do permiso de vertedura sen prexuízo da



imposición das sancións oportunas.

5. En ningún caso a revisión do permiso de vertedura comportará para o seu titular dereito a ningunha indemnización.

Artigo 21º. Revogación do permiso de vertedura

O permiso de vertedura ao sistema de saneamento e depuración poderá ser revogado, logo de audiencia do seu titular, nos seguintes supostos:

- a) Como consecuencia da revogación da autorización ou licenza que permita o desenvolvemento da actividade que causa a vertedura.
- b) Por incumprimento das condicións establecidas no permiso outorgado
- c) Por incumprimento dos requirimentos efectuados para adecuar a vertedura ás condicións establecidas no permiso.
- d) Como consecuencia dunha sanción que leve implícita a perda do permiso.
- d) A non aceptación ou incumprimento das modificacións do permiso de vertedura impostas como consecuencia da súa revisión.

Artigo 22º. Obrigas do titular do permiso de vertedura

A persoa titular do permiso de vertedura debe cumprir as obrigas seguintes:

- a) Comunicar de xeito inmediato ao Concello calquera avaría do proceso produtivo ou das súas instalacións de tratamento que poida afectar negativamente a calidade da vertedura ao sistema, así como calquera modificación nos procesos que inflúa na dita calidade.
- b) Comunicar ao Concello calquera circunstancia futura que implique unha variación das características cualitativas ou cuantitativas da vertedura, para os efectos de proceder, de ser o caso, á revisión do permiso.
- c) Adaptar a súa actividade e as súas instalacións ás medidas e actuacións que resulten da aplicación das normas previstas no artigo 31 deste regulamento.

Artigo 23º. Censos de verteduras ao sistema

1. Tal e como establece o artigo 17 do Decreto 141/2012, o Concello levará un censo informatizado de verteduras ao sistema no cal inscribirá as verteduras sometidas a permiso, e no cal deberán constar, como mínimo, os seguintes datos:

- a) Nome, enderezo, CNAE e NIF do titular do permiso.
- b) Datos básicos do caudal de auga de abastecemento e de vertedura.
- c) Condicións básicas do permiso, incluíndo a localización con coordenadas UTM e o acceso ao punto





de vertedura.

d) Situación administrativa do permiso.

e) Informe analítico da vertedura, renovado con periodicidade anual.

2. Incluíranse neste censo as verteduras non canalizadas as que se refire o artigo seguinte.

3. O censo de verteduras do Concello estará á disposición da Administración hidráulica de Galicia e, de ser o caso, da do Estado, para a súa utilización de acordo coa normativa vixente. A cesión de datos e notificación previa entre as administracións públicas non require autorización previa dos titulares nin notificación a eles.

Artigo 24º. Verteduras non canalizadas

1. Enténdese por verteduras non canalizadas aquelas que chegan á estación depuradora de augas residuais a través de medios de transporte que non son nin tubaxes nin canles.

2. Para efectuar verteduras ás instalacións de saneamento mediante sistemas non canalizados será necesario que, sen prexuízo dos permisos ou autorizacións exixibles de conformidade coa lexislación aplicable en materia de residuos, quen produza a vertedura obteña un permiso especial outorgado polo Concello.

3. Este tipo de verteduras deberán respectar as prohibicións e limitacións establecidas nos **Anexos III e IV** deste regulamento.

4. Exceptúanse das obrigas do punto anterior as verteduras procedentes de fosas sépticas ou da limpeza do sistema público de saneamento, no referente aos parámetros DQO, DBO, MES, sulfuros, aceites e graxas e as diferentes formas de nitróxeno e fósforo recollidas no **Anexo IV** deste regulamento.

5. As verteduras non canalizados só se poderán realizar na estación depuradora de augas residuais unha vez obtidas todas as autorizacións correspondentes. En todo caso, a incorporación destas verteduras pautarase de acordo coas indicacións ao respecto do Servizo, coa finalidade de evitar calquera alteración do proceso de depuración.

6. En ningún caso se poderán engadir estas verteduras non canalizadas na estación depuradora cando estea próxima ao límite ou saturada en canto á carga contaminante que se vai tratar.

Artigo 25º. Normas de mantemento, reposición e explotación das instalacións

1. O Concello, velará polo correcto funcionamento e estado de conservación do sistema público de saneamento e de depuración.

2. Para estes efectos, o Concello elaborará e executará os plans de mantemento de equipos,





instalacións electromecánicas e obra civil e conducións, de conformidade co establecido no **Anexo VII** deste regulamento.

3. En canto ás redes de sumidoiros e de colectores, e sen prexuízo das accións que permitan o seu correcto funcionamento, o Concello velará polo seu adecuado estado de limpeza e identificará as conexións existentes, os puntos de risco de incidencias no medio e as eventuais rupturas, fugas ou intrusionas de augas brancas.

4. En canto á estación depuradora de augas residuais, o Concello explotará a liña de auga e os lodos, en cumprimento da normativa aplicable en materia de augas, costas, verteduras, residuos e xestión de lodos de depuradora, de xeito que se asegure o rendemento adecuado da instalación, que non se obstaculice o seu bo funcionamento pola acumulación de lodos na liña de proceso, non se causen afeccións prexudiciais para o contorno e se asegure a evacuación dos lodos de acordo coa normativa vixente na materia.

5. O funcionamento e a xestión das estacións de bombeo na rede de saneamento deberá adecuarse ao deseño da estación depuradora de augas residuais tanto na capacidade de bombeo como no horario de funcionamento.

6. Nos supostos de parada forzosa do sistema de depuración de augas residuais, sexa programada ou imprevista, o Concello adoptará as medidas necesarias para minimizar as súas consecuencias, reducir o tempo de parada, realizar as reparacións no período de menor incidencia e asegurar o máximo grao de depuración posible.

7. Nos supostos de paradas programadas, o Concello deberá comunicalas ao organismo de bacía cun mes de antelación, polo menos, xustificando a súa necesidade e, en todo caso, informará a Augas de Galicia (e/ou ao Organismo de Bacía Correspondente) sobre as medidas propostas para minimizar posibles afeccións ao medio receptor cando se trate de instalacións situadas no ámbito territorial previsto no artigo 6.1.a) da Lei 9/2010. Augas de Galicia, logo de audiencia da consellería competente en materia de pesca e marisqueo nos supostos en que a parada poida afectar estas materias, emitirá nese prazo informe preceptivo e vinculante acerca das medidas que cómpre adoptar para minimizar a afección ao medio receptor.

Artigo 26º. Prevención de riscos laborais

1. Na execución das tarefas de explotación, conservación e mantemento dos sistemas de saneamento e depuración de augas residuais darase cumprimento ao previsto na normativa vixente en materia de prevención de riscos laborais, adoptando as medidas de protección individuais e colectivas que




resulten necesarias.


2. De conformidade co establecido na dita normativa, o Concello deberá dispoñer da avaliación de riscos laborais do sistema e do correspondente plan de seguridade.

CAPÍTULO IV

Inspección e control

Artigo 27º. Función inspectora

 A función inspectora corresponde ao Concello respecto das instalacións ao seu cargo, e pode exercela directamente, indirectamente por medio do Servizo ou de forma conxunta.

 Corresponde a Augas de Galicia a alta inspección de todos os sistemas de saneamento e depuración de augas residuais no ámbito territorial da Comunidade Autónoma sen prexuízo do exercicio das competencias propias dos organismos de bacía. En exercicio desa facultade, poderá levar a cabo cantos controis, ensaios e análises considere necesarios

3. As funcións inspectoras que corresponden a Augas de Galicia poderán ser encomendadas ás entidades a que se refire o Decreto 162/2010, do 16 de setembro, polo que se regulan as entidades colaboradoras da Administración hidráulica de Galicia en materia de control de verteduras e calidade das augas. O auxilio destas entidades nas funcións de inspección limitarase ás actividades técnicas que non comporten o exercicio de autoridade.

4. As funcións de inspección que corresponden competencialmente a Augas de Galicia e ao Concello coordinaranse co obxecto de mellorar a eficiencia e o control do sistema de saneamento.

Artigo 28º. Obxecto e inicio da inspección

1. Poden ser obxecto de inspección as actividades ou instalacións cuxas verteduras poidan afectar ao sistema de saneamento e depuración de augas residuais.

2. As inspeccións poden ser:

a- Por iniciativa do Concello ou por orde superior.

b- Inspección inicial do persoal inspector do Servizo para a concesión ou denegación do permiso de vertedura

c- Inspeccións do persoal inspector do Servizo para a toma das mostras estipuladas no permiso de vertedura e para comprobar o seu cumprimento .

 En virtude de denuncia.

Artigo 29º. Dereitos do persoal inspector

No exercicio da súa función, o persoal inspector do Concello ou do Servizo, debidamente acreditado



polo Concello, poderá:

- a- Acceder ás instalacións que xeran verteduras de augas residuais. Non será necesaria a notificación previa da inspección cando se efectúe en horas de actividade industrial.
- b- Efectuar notificacións e realizar requirimentos de información e documentación ou de actuacións concretas para a adecuación e mellora das verteduras de augas residuais.
- c- Proceder á toma de mostras ou ao control da vertedura de augas residuais e, de ser o caso, de augas de proceso.
- d- Proceder á montaxe ou instalación dos equipos que se precisen para a realización das medidas, ensaios ou comprobacións necesarias.
- d) Proceder á toma de fotografías ou outro tipo de imaxes gráficas, sen prexuízo do disposto na vixente normativa sobre segredo industrial.
- e) Levar a cabo calquera outra actuación tendente a descubrir a orixe das verteduras, o seu grao de contaminación e a súa afección sobre os sistemas de saneamento e depuración.

Artigo 30°. Deberes do persoal inspector

O persoal inspector está obrigado, durante o desenvolvemento das súas funcións, a:

- 1- Identificarse como tal e acreditar a súa condición de persoal inspector.
- 2- Observar o respecto e a consideración debidos ás persoas interesadas.
- 3- Informar as persoas interesadas, cando así sexan requiridas, dos seus dereitos e deberes en relación cos feitos obxecto da inspección, así como das normas que deben cumprir os titulares das verteduras.
- 4- Obter toda a información necesaria respecto dos feitos obxecto de inspección e dos seus responsables, accedendo, se é necesario, aos rexistros públicos existentes.



Gardar sxiilo profesional e segredo respecto dos asuntos que coñeza por razón do seu cargo e actividade pública.

Artigo 31°. Desenvolvemento da actividade inspectora

- 1. Cando o persoal inspector se presente no lugar onde radiquen as instalacións que se van inspeccionar, porá en coñecemento da persoa titular o obxecto das actuacións, logo de identificación mediante exhibición do documento que o acredite para o exercicio das súas funcións, no cal constarán o departamento ao cal está adscrito, o seu nome, apelidos, o número do documento nacional de identidade e unha fotografía.
- 2. As actuacións inspectoras realizaranse en presenza da persoa titular das instalación. No caso de persoas xurídicas, considerarase o seu representante quen legalmente teña a dita condición.



No caso de ausencia da persoa titular ou representante, as actuacións levaranse a cabo con calquera persoa presente na instalación, facendo constar na acta ou informe posterior a súa vinculación con elas. Non será obstáculo para a realización das actuacións a negativa ou imposibilidade da persoa titular ou representante de estar presente durante a súa práctica, sempre que así se faga constar nas actuacións que documenten a inspección.

3. A persoa interesada está obrigada a permitir o acceso do persoal inspector ás instalacións e a toma de mostras e medicións, e a subministrar a información que se lle requira en relación cos feitos obxecto da inspección. Non será necesaria a comunicación previa das visitas do persoal inspector.

4. No caso de obstaculización das actividades inspectoras, o persoal inspector farao constar así. Poderá proceder entón á toma de mostras de augas residuais desde o exterior do recinto das instalacións, sempre que sexa posible.

Artigo 32º. Documentación das actuacións inspectoras

1. As actuacións inspectoras documentaranse nunha acta por duplicado (**Anexo VIII**) na que tanto o persoal inspector como a persoa interesada poderán facer constar as observacións que consideren oportunas.

2. No caso de que a persoa comparecente se negue a asinar a acta ou a recibir a mostra contraditoria, o persoal inspector farao constar así, autorizando a acta coa súa sinatura e entregando unha copia á persoa interesada, deixando igualmente constancia de se esta se negou a recibila.

3. Os feitos constatados nas actas terán valor probatorio, cos efectos previstos no artigo 137.3 da Lei 30/1992, do 26 de novembro, de réxime xurídico das administracións públicas e do procedemento administrativo común.

4. No caso de que o levantamento ou o asinamento da acta se produzan sen a presenza da persoa titular ou do representante do establecemento produtor da vertedura, notificaráselle o documento para os efectos de que poidan presentar cantas alegacións e probas consideren convenientes no prazo de dez días.

5- No caso de que a empresa estea descontente cos ditames, apreciacións e xuízos formulados pola Inspección, poderá presentar as oportunas alegacións diante da Administración para que esta, logo do informe dos Servizos Técnicos Municipais correspondentes, dite a resolución que estime procedente.

5. Os custes das inspeccións iniciais para a concesión do permiso de vertedura, das inspeccións periódicas, das ocasionais e dos informes que resulten, serán custeados integramente polo titular da instalación segundo os prezos do Anexo XIII e se actualizarán anualmente segundo o IPC.



Artigo 33º. Toma de mostrás

A toma de mostrás de augas residuais para a concesión do permiso de vertedura e para levar a cabo as correspondentes inspeccións, deberá seguir o seguinte procedemento:

1- Punto de toma de mostrás. A mostra tomarase da arqueta de rexistro existente, logo de comprobación das coordenadas UTM ou, no seu defecto, no último punto accesible de saída das augas residuais das instalacións de produción ou tratamento, previo á incorporación ás redes de saneamento e a calquera dilución.

2- Preparación da mostra. Para a obtención da mostra tomarase nun recipiente unha cantidade de efluente suficiente para poder dividila en tres submostrás en cadanseus recipientes de material adecuado ás determinacións analíticas que se prevexa realizar. Os recipientes enxaugaranse previamente co mesmo efluente obxecto da mostraxe.

3. As mostrás así obtidas precintaranse e identificaranse. Dúas quedarán en poder do persoal inspector, a primeira para efectuar as determinacións analíticas da análise inicial e a segunda para a práctica dunha eventual análise dirimente. A terceira ofreceráselle á persoa interesada, para os efectos de que poida proceder, se o considera oportuno, á práctica da análise contraditoria. No caso de que a persoa interesada se negue a recibir esta terceira mostra ou non poida facerse cargo dela, comunicárselle o lugar en que queda á súa disposición.

4. A natureza dos envases, as súas condicións de preservación, así como os métodos analíticos dos diferentes parámetros, serán os que figuran no **anexo X** do presente regulamento.

5. O volume mínimo para realizar a mostraxe será de dous litros para cada unha das tres mostrás referenciadas no punto tres deste artigo, agás que xustificadamente se poida utilizar un volume menor. Este volume subdividirase en senllos recipientes dun litro, un de vidro e outro de plástico, en función dos parámetros que se van analizar.

6. As tomas de mostrás documentaranse nunha acta por duplicado (**Anexo IX**).

7. Poderá prescindirse da toma de mostrás para determinar as súas características contaminantes cando se trate de verteduras de natureza inequivocamente doméstica ou gandeira e o persoal inspector así o faga constar expresamente na acta.

Artigo 34º. Práctica das análises

1- Para a práctica da análise inicial e da contraditoria deberá entregarse ao laboratorio de que se trate a mostra correspondente, debidamente conservada, no prazo máximo de 72 horas desde a toma de mostrás, para os efectos de iniciar o procedemento de análise no dito prazo.



- 2- As determinacións analíticas da mostra inicial e da contraditoria levaranse a cabo en laboratorios que dispoñan de acreditación que garanta o cumprimento da norma UNE-EN-ISO 17025. Tamén se poderán levar a cabo no Laboratorio de Medio Ambiente de Galicia.
- 3- O laboratorio a que se encargue a práctica da análise inicial deberá entregar os resultados ao Servizo no prazo de trinta días naturais desde a recepción da mostra, e o Servizo procederá a comunicalos á persoa interesada. A comunicación á persoa interesada deberá realizarse no prazo de dez días desde a recepción dos resultados polo Servizo.
- 4- A folla de resultados analíticos, tanto na análise inicial como na contraditoria, expresará en todo caso a data de recepción da mostra, de inicio e de fin da análise, así como os métodos analíticos empregados. De ser o caso, farase constar igualmente o estado de conservación da mostra á súa chegada ao laboratorio.
5. Pola súa parte, a persoa interesada poderá facer uso do dereito a realizar a análise contraditoria. Nese caso, comunicarlle á entidade xestora os resultados da dita análise, se o considera procedente.
6. A práctica da análise dirimente, por solicitude de calquera das partes, levarase a cabo no laboratorio que designe o Servizo entre os indicados no punto 2. A mencionada entidade comunicarlle á persoa interesada con antelación suficiente o lugar, a data e a hora onde se levará a cabo, para os efectos de que poida estar presente nas operacións, asistida, se o xulga oportuno, de persoal técnico. En ningún caso se tomará en consideración a petición de análises dirimentes logo de transcorridos dous meses desde a data da toma de mostras, ou cando non se realizase análise contraditoria.
7. Os gastos xerados pola práctica das análises inicial e contraditoria corresponden sempre á persoa interesada. Os gastos da análise dirimente corresponden á parte que a solicite. Os prezos das análises para o ano 2013 serán os definidos no Anexo XIII e se actualizarán anualmente segundo o IPC.
8. En canto aos parámetros a analizar, tomaranse como referencia as recomendación de Augas de Galicia (**Anexo XII**).

CAPÍTULO V

Situacións de emerxencia

Artigo 35°. Comunicación

1. Cada persoa usuaria deberá tomar as medidas adecuadas para evitar as descargas accidentais de verteduras que poidan ser potencialmente perigosas para a saúde das persoas ou a seguridade das instalacións que compoñen o sistema público de saneamento e depuración, así como para o medio receptor.



2. Cando por accidente, fallo de funcionamento ou da explotación das instalacións da persoa usuaria se produza unha vertedura que estea prohibida e que sexa capaz de orixinar unha situación de emerxencia e perigo tanto para as persoas coma para o sistema de saneamento e depuración, o usuario deberá comunicar urxentemente a circunstancia producida ao Concello e ao Servizo así como ao número de emerxencias 112, co obxecto de evitar ou reducir ao mínimo os danos que se poidan causar. A comunicación efectuarase utilizando o medio máis rápido.

Artigo 36°. Adopción de medidas en situacións de emerxencia

1. Unha vez producida a situación de emerxencia, a persoa usuaria utilizará todos os medios ao seu alcance para reducir ao máximo os efectos da descarga accidental.

2. A persoa usuaria deberá remitir ao Concello e ao Servizo, no prazo máximo de corenta e oito horas, un informe detallado do accidente, no cal deberán figurar os seguintes datos: identificación da empresa, caudal e materias vertidas, causa do accidente, hora en que se produciu, medidas correctoras tomadas *in situ*, hora e forma en que se comunicou o suceso.

Artigo 37°. Valoración de danos

Os custos das operacións a que dean lugar os accidentes que ocasionen situacións de emerxencia ou perigo, así como os de limpeza, remoción, reparación ou modificación do sistema de saneamento e depuración, deberán ser aboados pola persoa usuaria causante, con independencia doutras responsabilidades en que puiden incurrir.

Artigo 38°. Accidentes maiores

Cando as situacións de emerxencia a que se fai referencia nos artigos anteriores poidan ser cualificadas de accidentes maiores a criterio da Axencia Galega de Emerxencias, ademais das normas establecidas no presente regulamento, serán de aplicación as disposicións normativas vixentes en Galicia en materia de protección civil e xestión de emerxencias.

CAPÍTULO VI

Réxime de infraccións e sancións

Artigo 39°. Principios

1- O Concello terá a capacidade de impoñer aos titulares conectados ás redes de saneamento as correspondentes sancións derivadas das infraccións cometidas por estes.

2- Constitúen infraccións administrativas as accións ou omisións dos distintos suxeitos responsables tipificadas e sancionadas nos seguintes artigos.

3- As infraccións e sancións reguladas neste título enténdense sen prexuízo das



responsabilidades civís, penais ou doutra orde nas que podan incorrer os seus autores.

4- No non regulado por este título aplicarase o establecido na lexislación básica do Estado sobre o exercicio da potestade sancionadora.

5- As infraccións califícanse en leves, graves e moi graves segundo se determina nos artigos seguintes.

Artigo 40º. Infraccións leves

Consideraranse infraccións leves:

1- A vertedura ao sistema público de saneamento e/ou depuración de augas residuais sen contar coa licenza municipal ou sen axustarse ás condicións sinaladas nela ou ás disposicións deste regulamento.

2- Cando se localicen acometidas de verteduras que non dispoñen de contrato, é dicir, realizadas clandestinamente.

3- A construción ou modificación de sumidoiros, acometidas ou conexión á rede ou instalacións anexas á mesma ou o uso das mesmas, aínda sendo de propiedade particular, sen obter a licenza municipal previa de conexión aos sumidoiros, o usen axustarse ás condicións sinaladas nela ou ás disposicións deste regulamento.

4- Cando se detecte a instalación, sen autorización previa, de bombas ou calquera outro elemento que afecte ou poida afectar á rede de sumidoiros e/ou que interfira no servizo prestado a outros usuarios.

5- O incumprimento das condicións establecidas no permiso de vertedura, sempre que non causen dano ao sistema público de saneamento ou depuración ou ben cando estes danos non superen os 3.000 €.

6- As acción e omisións das que se deriven danos ou perdas para a integridade ou funcionamento do sistema público de saneamento ou depuración inferiores a 3.000 €.

7- A non execución das arquetas de control descritas no presente regulamento necesarias para a inspección por parte do Concello ou do Servizo.

8- A desobediencia ás ordes ou requirimentos do persoal de Augas de Galicia ou do Concello no exercicio das funcións que teñen encomendadas, así como a obstaculización de dito exercicio.

9- O incumprimento dos deberes de colaboración.

10- Omitir información ao Concello ou ao Servizo sobre as características da descarga da vertedura ou sobre os cambios que afecten á natureza das mesmas.





11- A posta en funcionamento de aparellos ou instalacións non autorizadas, ou distintas ás aprobadas para o permiso de vertedura, así como o desprecintado ou anulación dos que fosen colocados.

7- O incumprimento de calquera prohibición establecida neste Regulamento ou a omisión dos actos aos que obriga sempre que non estean considerados como infraccións graves ou moi graves.

Artigo 41º. Infraccións graves

Consideraranse infraccións graves:

1- A reincidencia nalgunha falta leve

2- A vertedura de augas residuais de natureza distinta á doméstica sen contar co permiso de vertedura correspondente.

3- A realización de verteduras que conteñan algunha das substancias prohibidas relacionadas no

Anexo III .

4- Realizar verteduras superando os límites sinalados no **Anexo IV**.

5- O incumprimento das condicións establecidas no permiso de vertedura sempre que se produzan danos ao sistema público de saneamento ou depuración superiores a 3.000 € e ata 15.000 €.

6- As acción e omisións das que se deriven danos ou perdas para a integridade ou o funcionamento dos sistemas públicos superiores a 3.000 € e ata 15.000 € xa sexan causadas maliciosamente ou por negligencia.

7- A evacuación de verteduras sen tratamento previo cando estas o requiran.

8- A ocultación ou falseamento dos datos esixidos na solicitude ou aportados na declaración responsable que sexan determinantes para a concesión do permiso de vertedura.

9- A obstrución á labor inspectora ou a negativa a facilitar a información requirida.

10- Cando o usuario non permita o acceso ao local de orixe da vertedura dos inspectores debidamente identificados que traten de revisar a instalación. É necesario facer constar a negativa mediante testemuñas ou en presenza dun axente da autoridade.

11- A falta de comunicación das situación de emerxencia e/ou infracción de calquera das prescricións ditadas como consecuencia de declararse dita situación recollidas neste Regulamento.

12- A omisión ou demora na instalación dos tratamentos de depuración esixidos polo Concello así como a falta de instalación, funcionamento e mantemento de todos os equipos en especial dos dispositivos fixos de aforamento de caudais, toma de mostras e aparellos de medición aos que se fai referencia neste regulamento.



Artigo 42º. Infraccións moi graves

Consideraranse infraccións moi graves:

- 1- A reincidencia nalgunha das faltas graves.
- 2- Calquera conduta indicada no artigo 41º da que se deriven danos ou perdas para os sistemas públicos de saneamento e/ou depuración superiores a 15.000 €.
- 3- As infraccións cualificadas como graves no artigo 41º que, por calidade ou cantidade da vertedura, deriven na existencia dun risco moi grave para a saúde das persoas, os recursos naturais ou o medioambiente.

Artigo 43º. Sancións

1- A imposición de sancións e a esixencia de responsabilidades conforme a este regulamento realizarase mediante a instrución do correspondente expediente sancionador e segundo os artigos 280.2, 287 e 289 da Lei 5/1997 de Administración Local de Galicia, e en relación co previsto no artigo 116.3 a) do Texto refundido da Lei de Augas aprobado polo Real Decreto Lexislativo 1/2001 de 20 de xullo.

1- As infraccións poderán dar lugar á imposición das seguintes sancións:

- α- Multa
- β- Suspensión temporal do permiso de actividade.
- χ- Suspensión definitiva, total ou parcial do permiso de actividade.

2- As infraccións tipificadas nos artigos 40º, 41º e 42º serán sancionadas coas seguintes multas:

- a- Infraccións leves: multa de ata 750 €
- b- Infraccións graves: multa entre 750 € e 1.500 €
- c- Infraccións moi graves: multa entre 1.500 € e 3.000 €.

3- O cálculo do custo da sanción por incumprimento dalgún dos parámetros limitados farase en función da seguinte fórmula:

$$\text{SANCIÓN (EUROS)} = (R-L) \times P \times F \times C \times Q$$

Sendo,

R: resultado analítico do parámetro (mg/l)

L: límite do Regulamento para ese parámetro (mg/l)

P: prezo aprobado na Ordenanza Fiscal correspondente. Proponse un valor de 0.0050 €

F: coeficiente de contaminación para ese parámetro fixado no **Anexo XI**

C: coeficiente de valoración da contaminación= 15





Q: coeficiente de penalización por caudal:

- Caudais inferiores a 16 m³/día : sen penalización
- Caudais entre 16 m³/día e 150 m³/día: penalización do 10 %
- Caudais superiores a 150 m³/día: penalización do 25 %

4- As sancións gradúanse en función da reincidencia do infractor, da súa intencionalidade, do beneficio obtido, da afección producida ao sistema público de saneamento e/ou depuración ou a calidade do medio receptor e prexuízo ocasionado de interés xeral. En todo caso, para a graduación das sancións, terase en conta o principio de proporcionalidade definido no artigo 131.2 da Lei 30/1992, de 26 de novembro, de Régimen Jurídico de las Administraciones Públicas y del Procedimiento Administrativo Común.

5- Serán responsables as persoas físicas ou xurídicas que realicen os actos ou incumplan os deberes que constitúan a infracción, e no caso de establecementos industriais ou comerciais, os titulares dos mesmos.

6- Para a gradación das multas a impoñer dentro dos límites mencionados, teranse en conta os seguintes criterios asegurando a adecuación necesaria entre a gravidade do feito constitutivo da infracción e a sanción aplicada:

- a- A existencia de intencionalidade ou reiteración.
- b- A gravidade do feito constitutivo da infracción considerando os danos e prexuízos producidos.
- c- O risco obxectivo causado aos bens ou ás persoas.
- d- A relevancia externa da conduta infractora.
- e- A reincidencia por ter cometido no prazo dun ano máis dunha infracción da mesma natureza, sempre que se teña declarado así por resolución firme.

Artigo 44°. Órganos competentes

A potestade sancionadora corresponde ao Alcalde-Presidente do Concello ou Autoridade na que delegue. Así e todo, o Concello, con independencia das actuacións contempladas neste artigo, poderá instar a outros organismos competentes a incoación de expedientes ao abeiro da lexislación vixente.

O Concello poderá suspender provisionalmente a execución das obras e instalacións que contraveñan o disposto neste regulamento, así como impedir, tamén provisionalmente, o uso indebido das instalacións municipais. Esta medida deberá adoptarse mediante requirimento individual e por escrito, o cal, para manter a súa eficacia deberá ser ratificado dentro dos cinco días hábiles seguintes polo Alcalde, ou a Autoridade en quen tivese delegado.



Contra a referida suspensión provisional e contra a ratificación da mesma, no caso de que fose adoptada pola Autoridade delegada, poderase interpoñer recurso de alzada diante do Alcalde, independentemente de calquera outro que fose procedente.

O Concello, será competente para a incoación, tramitación e resolución dos procedementos sancionadores, en aplicación das súas ordenanzas locais.

O prazo máximo para a tramitación e resolución do procedemento sancionador será dun ano dende a data da súa iniciación. No caso de sobrepasarse o dito prazo producirase a caducidade do procedemento.

Artigo 45º. Procedemento e medidas cautelares

O procedemento para a tramitación dos expedientes será o previsto na vixente normativa xeral de procedemento administrativo común.

No caso de vulneración das disposicións do presente regulamento, e con independencia da imposición das sancións procedentes, o Concello, coa finalidade de suprimir os efectos da infracción e restaurar a situación de legalidade, poderá adoptar algunha das seguintes disposicións:

- 1- A suspensión dos traballos de execución das obras de acometida ou de instalación de pretratamento indebidamente realizadas.
- 2- Requerir ao infractor para que no termo que para o efecto se sinala introduza nas obras e instalacións realizadas as rectificacións precisas para axustalas ás condicións do permiso ou as disposicións deste regulamento e/ou no seu caso, proceder a reposición das obras e instalacións indebidamente efectuadas ao seu estado anterior á produción dos danos que tiveran ocasionado.
- 3- Se o infractor non procedese a reparar o dano causado no prazo sinalado no expediente sancionador, o Concello poderá proceder á imposición de multas coercitivas sucesivas.
- 4- A imposición ao usuario das medidas técnicas necesarias que garantan o cumprimento das limitacións consignadas no permiso de vertedura, evitando o efluente anómalo
- 5- A introdución de medidas correctoras concretas na instalación con tal de evitar o incumprimento das prescricións deste regulamento e a redacción, se é o caso, do proxecto correspondente, dentro do prazo que fixe a Administración
- 6- A clausura ou precinto das instalacións no caso de que sexa posible técnica ou economicamente evitar a infracción mediante as oportunas medidas correctoras.
- 7- A caducidade do permiso de vertedura á rede de sumidoiros, no caso de contumacia no incumprimento das condicións deste regulamento.



8- A reposición dos danos e perdas ocasionados ás instalacións, obras anexas ou calquera outro ben que resultase danado ou prexudicado.

Artigo 46º. Prescrición

As infraccións reguladas neste título prescribirán nos prazos seguintes:

- a) Un ano no caso de infraccións leves.
- b) Tres anos no caso de infraccións graves.
- c) Cinco anos no caso de infraccións moi graves.

O prazo contarase dende a comisión do feito ou dende a detección do dano si este non fora inmediato.

As sancións ás que se refire este título prescribirán nos prazos seguintes:

- a) As sancións impostas por infraccións leves prescribirán ao ano.
- b) As sancións impostas por infraccións graves prescribirán aos dous anos.
- c) As sancións impostas por infraccións moi graves prescribirán aos tres anos.

O prazo de prescrición comezará a contarse dende o día seguinte ao que sexa firme a resolución en vía administrativa pola que se impón a sanción.

Artigo 47º. Valoración de danos

1. A valoración dos danos ás obras hidráulicas para os efectos da aplicación do réxime sancionador a que se refire o presente capítulo será realizada polo Concello, e determinarase en función dos gastos de explotación e, de ser o caso, de reposición daquelas.

2. Os danos ás obras hidráulicas que conforman o sistema de saneamento e depuración calcularanse en euros/día, como resultado da ponderación do custo diario de explotación das instalacións públicas afectadas en relación co caudal e carga contaminante da vertedura de que se trate.

3. O Concello determinará, de acordo cos orzamentos aprobados para o efecto e as correspondentes certificacións, os gastos de explotación repercutibles ao responsable da vertedura de que se trate.

4. A valoración de danos que servirá de base para a cualificación da infracción, para a cuantificación da sanción e, de ser o caso, da indemnización que deba impoñerse, resultará do cálculo a que se refire o punto segundo multiplicado polo número de días que se considere que a vertedura se mantivo en situación irregular.

5. Para os efectos do disposto no punto anterior, computaranse os gastos correspondentes a todo o período en que a instalación pública de saneamento ou de depuración de augas residuais quedase afectada pola vertedura irregular, mesmo se este for de carácter illado. En calquera caso, considerarase que a vertedura irregular se mantivo durante, cando menos, un día.



CONCELLO DE BARBADÁS

6. A valoración de danos deberá notificarse ao presunto/a infractor/a simultaneamente co prego de cargos que se dite no correspondente expediente sancionador.

Barbadás, 21 de agosto de 2014

O Alcalde

José Manuel Freire Couto

